

摘藻堂四庫全書薈要

集部

欽定四庫全書薈要

集部

淮海長短句卷上

中下

詳校官助教臣謝登雋



欽定四庫全書薈要卷一萬五千二百六十五

集部

淮海長短句卷上

宋 秦觀 撰



望海潮四首

廣陵懷古

星分牛斗疆連淮海揚州萬井提封花發路香鶯啼人
起朱簾十里春風豪俊氣如虹曳照春金紫飛蓋相從
巷入垂楊畫橋南北翠煙中 追思故國繁雄有迷樓

挂斗月觀橫空紋錦製帆明珠濺雨寧論雀馬魚龍往
事逐孤鴻但亂雲流水縈帶離宮最好揮毫萬字一飲
拚十鍾

又越州懷古

秦峰蒼翠耶溪瀟灑千巖萬壑爭流鴛瓦雉城譙門畫
戟蓬萊燕閣三休天際識歸舟汎五湖煙月西子同遊
茂草荒臺苧蘿村冷起閒愁何人覽古凝眸悵朱顏
易失翠被難留梅市舊書蘭亭古墨依稀風韻生秋狂

客鑑湖頭有百年臺沼終日夷猶最好金龜換酒相與
醉滄洲

又洛陽懷古

梅英疎淡冰漸溶東風暗換年華金谷俊游銅駝巷
陌新晴細履平沙長記誤隨車正絮飏蝶舞芳思交加
柳下桃蹊亂分春色到人家西園夜飲鳴笳有華燈
礙月飛蓋妨花蘭苑未空行人漸老重來是事堪嗟煙
暝酒旗斜但倚樓極目時見棲鴉無奈歸心暗隨流水

到天涯

又別意

奴如飛絮郎如流水相沾便肯相隨微月戶庭殘燈簾
幙怱怱共惜佳期纔話暫分携早抱人嬌咽雙淚紅垂
畫舸難停翠幃輕別兩依依別來怎表相思有分香
帕子合數松兒紅粉脆痕青牋嫩約丁寧莫遣人知成
病也因誰更自言秋杪親去無疑但恐生時注著合有
分于飛

沁園春 春思

宿靄迷空，膩雲籠日，晝景漸長。正蘭皋泥潤，誰家燕喜，
蜜脾香少，觸處蜂忙。盡日無人，簾幕挂更風遞，遊絲時
過牆。微雨後，有桃愁杏怨，紅淚淋浪。風流寸心易感，
但依依、佇立回盡柔腸。念小奩瑤鑑，重勻絳蠟，玉籠金
斗時，熨沉香柳。下相將遊冶處，便回首，青樓成異鄉。相
憶事，縱蠻牋萬疊，難寫微茫。

水龍吟 贈妓婁東玉

小樓連苑橫空下窺繡轂雕鞍驟疎簾半捲單衣初試
清明時候破暖輕風弄晴微雨欲無還有賣花聲過盡
斜陽院落紅成陣飛鴛甃玉珮丁東別後悵佳期參
差難又名韁利鎖天還知道和天也瘦花下重門柳邊
深巷不堪回首念多情但有當時皓月向人依舊

八六子

倚危亭恨如芳草萋萋剗盡還生念柳外青驄別後水
邊紅袂分時愴然暗驚無端天與娉婷夜月一簾幽

夢春風十里柔情怎奈何歡娛漸隨流水素絃聲斷翠
綃香減那堪片片飛花弄晚濛濛殘雨籠晴正銷凝黃
鸝又啼數聲

風流子

東風吹碧草年華換行客老滄洲見梅吐舊英柳搖新
綠惱人春色還上枝頭寸心亂北隨雲黯黯東逐水悠
悠斜日半山暝烟兩岸數聲橫笛一葉扁舟青門同
攜手前歡記渾似夢裏揚州誰念斷腸南陌回首西樓

算天長地久有時有盡奈何綿綿此恨難休擬待倩人
說與生怕人愁

夢揚州

晚雲收正柳塘煙雨初休燕子未歸惻惻輕寒如秋小
欄外東風軟透繡幃花密香稠江南遠人何處鷓鴣啼
破春愁長記曾陪燕遊酬妙舞清歌麗錦纏頭殢酒
困花十載因誰淹留醉鞭拂面歸來晚望翠樓簾捲金
鈎佳會阻離情正亂頻夢揚州

雨中花

指點虛無征路醉乘斑蚪遠訪西極見天風吹落滿空
寒皇女明星迎笑何苦自淹塵域正火輪飛上霧捲煙
開洞觀金碧重重觀閣橫枕鼇峰水面倒銜蒼石隨
處有奇香幽火杳然難測好是蟠桃熟後阿環偷報消
息在天碧海一枝難遇占取春色

一叢花

年時今夜見師師雙頰酒紅滋疎簾半捲微燈外露華

上煙裊涼颼簪髻亂拋偎人不起彈淚唱新詞 佳期
誰料久參差愁緒暗縈絲想應妙舞清歌罷又還對秋
色嗟咨惟有畫樓當時明月兩處照相思

鼓笛慢

亂花叢裏曾攜手窮艷景迷歡賞到如今誰把雕鞍鎖
定阻遊人來往好夢隨春遠從前事不堪思想念香闥
正杳佳歡未偶難留戀空惆悵 永夜嬋娟未滿嘆玉
樓幾時重上那堪萬里却尋歸路指陽關孤唱苦恨東

流水桃源路欲回雙槳仗何人細與丁寧問呵我如今
怎向

促拍滿路花

露顆添花色月彩投窗隙春思如中酒恨無力洞房咫尺
曾寄青鸞翼雲散無蹤跡羅帳薰殘夢回無處尋覓
輕紅膩白步步薰蘭澤約腕金環重宜裝飾未知安
否一向無消息不似尋常憶憶後教人片時存濟不得

長相思

鐵甕城高蒜山渡濶千雲十二層樓開樽待月掩箔披
風依然燈火揚州綺陌南頭記歌名宛轉鄉號溫柔曲
檻俯清流想花陰誰繫蘭舟念淒絕秦絃感深荆賦
相望幾許凝愁勤勤裁尺素奈雙魚難渡瓜洲曉鑒堪
羞潘鬢點吳霜漸稠幸子飛鴛鴦未老不

滿庭芳三首

山抹微雲天連衰草畫角聲斷譙門暫停征棹聊共引
離尊多少蓬萊舊事空回首煙靄紛紛斜陽外寒鴉數

點流水繞孤村 銷魂當此際香囊暗解羅帶輕分謾

贏得青樓薄倖名存此去何時見也襟袖上空惹啼痕

傷情處高城望斷燈火已黃昏

晁云斜陽外三句雖不識字人亦知為天生好

語言

又

紅蓼花繁黃蘆葉亂夜深玉露初零霽天空濶雲淡楚
江清獨棹孤篷小艇悠悠過烟渚沙汀金鉤細絲綸慢
捲牽動一潭星 時時橫短笛清風皓月相與忘形任

人笑生涯泛梗飄萍飲罷不妨醉臥塵勞事有耳誰聽
江風靜日高未起枕上酒微醒

又

碧水驚秋黃雲凝暮敗葉零亂空塔洞房人靜斜月照
徘徊又是重陽近也聽處處砧杵聲催西窗下風搖翠
竹疑是故人來傷懷增悵望新懽易失往事難猜問
籬邊黃菊知為誰開謾道愁須殢酒酒未醒愁已先回
憑闌久金波漸轉白露點蒼苔

江城子三首

西城楊柳弄春柔
動離憂
淚難收
猶記多情曾為繫歸
舟
碧野朱橋當日事
人不見
水空流
韶華不為少年
留
恨悠悠幾時休
飛絮落花時候一登樓
便做春江都
是淚
流不盡許多愁

詞人佳句多是翻案古人語如淮海此詞便做春江
都是淚流不盡許多愁可謂警句雖用李密數隋檄
語亦自李後主問君都有幾多愁却似一江春水
向東流變化名家如此類者不可枚舉亦一法也

又

南來飛燕北歸鴻
偶相逢
慘愁容
綠鬢朱顏重見兩衰
翁
別後悠悠君莫問
無限事不言中
小槽春酒滴珠
紅
莫怱怱滿金鍾
飲散落
花流水
各西東
後會不知何
處是
煙浪遠
暮雲重

又

東花金釧約柔荑
昔曾携事難期
咫尺玉顏和淚鎖金
閨
恰似小園桃與李
雖同處不同枝
玉笙初度顫鸞
篋
落花飛為誰吹
月冷風高此恨只天知
任是行人無

定處重相見是何時

滿園花

一向沉吟久淚珠盈襟袖我當初不合苦攢就慣縱得
軟頑見底心先有行待痴心守甚捻著脉子倒把人來
偏憊 近日來非常羅皂醜佛也須眉皺怎掩得衆人
口待收了李羅罷了從來斗從今後休道共我夢見也
不能得勾

迎春樂

菖蒲葉葉知多少惟有箇蜂兒妙雨晴紅粉齊開了露
一點嬌黃小 早是被曉風力暴更春共斜陽俱老怎
得花香深處作箇蜂兒抱

花香原作香香
恐是當時語

淮海長短句卷上

欽定四庫全書薈要卷一萬五千二百六十六

集部

淮海長短句卷中

宋 秦觀 撰

長短句

鵲橋仙

纖雲弄巧飛星傳恨銀漢迢迢暗度金風玉露一相逢
便勝却人間無數柔情似水佳期如夢忍顧鵲橋歸
路兩情若是久長時又豈在朝朝暮暮

菩薩蠻

蟲聲泣露驚秋枕羅幃淚濕鴛鴦錦獨臥玉肌涼殘更
與恨長陰風翻翠幔雨澀燈花暗畢竟不成眠鴉啼
金井寒

減字木蘭花

天涯舊恨獨自淒涼人不問欲見回腸斷續金爐小篆
香黛蛾長斂任是東風吹不轉困倚危樓過盡飛鴻
字字愁

木蘭花

秋容老盡芙蓉院
草上霜花勻似剪
西樓促坐酒盃深
風壓繡簾香不捲
玉纖慵整銀箏鴈
紅袖時籠金鴨
煖歲華一任委西風
獨有春紅留醉臉

畫堂春

落紅鋪徑水平池
弄晴小雨霏霏
杏園憔悴杜鵑啼
無奈春歸
柳外畫樓獨上
凭欄手撚花枝
放花無語對斜暉
此恨誰知

千秋歲

水邊沙外城郭春寒退花影亂鶯聲碎飄零疎酒盞離
別寬衣帶人不見碧雲暮合空相對憶昔西池會鵷
鷺同飛蓋攜手處今誰在日邊清夢斷鏡裏朱顏改春
去也飛紅萬點愁如海

踏莎行

霧失樓臺月迷津渡桃源望斷無尋處可堪孤館閉春
寒杜鵑聲裏斜陽暮驛寄梅花魚傳尺素砌成此恨

無重數郴江幸自遶郴山為誰流下瀟湘去

坡翁絕愛此詞尾兩句自書於扇云少游已矣雖萬人何贖釋天隱註三體唐詩謂此二句實自沅湘日夜東流去不為愁人住少時變化然邶之悲彼泉水亦流於淇已有此意秦公蓋出諸此又王直方詩話載黃山谷惜此詞斜陽暮意重欲易之未得其字今郴志遂作斜陽度愚謂此亦何害而病其重也李太白詩睽彼落日暮即斜陽暮也劉禹錫烏衣巷口夕陽斜杜工部山木蒼蒼落日曛皆此意別如韓文公紀夢詩中有一人壯非少石鼓歌安置妥帖平不頗之類尤多豈可亦謂之重耶山谷當無此言即誠出山谷亦一時之言未足為定論也

蝶戀花

曉日窺軒雙燕語似與佳人共惜春將暮屈指艷陽都
幾許可無時霎閒風雨流水落花無問處只有飛雲
冉冉來還去持酒勸雲雲且住憑君礙斷春歸路

一落索

楊花終日飛空舞奈久長難駐海潮雖是暫時來却有
箇堪憑處紫府碧雲為路好相將歸去肯如薄倖五
更風不解與花為主

醜奴兒

夜來酒醒清無夢愁倚闌干露滴輕寒雨打芙蓉淚不
乾 佳人別後音塵悄瘦盡難拚明月無端已過紅樓
十二間

南鄉子

妙手寫徽真水剪雙眸點絳唇疑是昔年窺宋玉東鄰
只露牆頭一半身 往事已酸辛誰記當年翠黛顰盡
道有些堪恨處無情任是無情也動人

醉桃源 即阮郎歸

碧天如水月如眉城頭銀漏遲綠波風動畫船移嬌羞
初見時銀燭暗翠簾垂芳心兩自知楚臺魂斷曉雲
飛幽歡難再期

河傳二首

亂花飛絮又望空關合離人愁苦那更夜來一霎薄情
風雨暗掩將春色去籬枯壁盡因誰做若說相思佛
也眉兒聚莫恠為伊抵死縈腸惹肚為沒教人恨處

又

恨眉醉眼甚輕輕
覷著神魂迷亂
常記那回小曲闌干
西畔鬢雲鬆
羅襪刻丁香笑吐嬌
無限語軟聲低道
我何曾慣雲雨未
諧早被東風吹散
悶損人天不管

浣溪沙五首

漠漠輕寒上小樓
曉陰無賴似窮秋
澹煙流水畫屏幽
自在飛花輕似夢
無邊絲雨細如愁
寶簾閒挂小銀鈎

又

香靨凝羞一笑開
柳腰如醉暖相挨
日長春困下樓臺
照水有情聊整鬢
倚闌無緒更兜鞋
眼邊牽恨懶歸來

又

霜縞同心翠黛連
紅綃四角綴金錢
惱人香爇是龍涎
枕上忽收疑是夢
燈前重省不成眠
又還一段惡因緣

又

脚上鞋兒四寸羅唇邊朱粉一櫻多見人無語但圓波
料得有心憐宋玉只應無奈楚襄何今生有分共伊
麼

又

錦帳重重卷暮霞屏風曲曲鬪紅牙恨人何事苦離家
枕上夢魂飛不去覺來紅日又西斜滿庭芳草襯殘

花前段用元微之天台詩意後段
婉約有味尾句尤含蓄深思

如夢令五首

門外鴉啼楊柳春色著人如酒睡起熨沉香玉腕不勝
金斗消瘦消瘦還是褪花時候

又

遙夜沉沉如水風緊驛亭深閉夢破鼠窺燈霜送曉寒
侵被無寐無寐門外馬嘶人起

又

幽夢忽忽破後粒粉亂痕霑袖遙想酒醒來無奈玉銷
花瘦回首回首遶岸夕陽疎柳

又

樓外殘陽紅滿春入柳條將半桃李不禁風回首落英
無限腸斷腸斷人共楚天俱遠

又

池上春歸何處滿目落花飛絮孤館悄無人夢斷月堤
歸路無緒無緒簾外五更風雨

阮郎歸四首

褪花新綠漸團枝撲人風絮飛秋千未拆水平堤落紅

成地衣 遊蝶困乳鶯啼怨春春怎知日長早被酒禁
持那堪更別離

又

宮腰裊裊翠鬟鬆夜堂深處逢無端銀燭殞秋風靈犀
得暗通 更有限恨無窮星河沉曉空隴頭流水各西
東佳期如夢中

又

瀟湘門外水平鋪月寒征棹孤紅粧飲罷少踟躕有人

偷向隅 揮玉筯洒真珠梨花春雨餘人人盡道斷腸
初那堪腸也無

又

湘天風雨破寒初深沉庭院虛麗譙吹罷小單于迢迢
清夜徂 鄉夢斷旅魂孤崢嶸歲又除衡陽猶有雁傳
書郴陽和鴈無

滿庭芳三首 咏茶

北苑研膏方圭圓璧萬里名動京關碎身粉骨功合上

凌煙尊俎風流戰勝降春睡
開拓愁邊纖纖捧香泉滅
乳金縷鷓鴣斑相如方病酒
一觴一詠賓有羣賢半
扶起燈前醉玉頰山搜攪胸中萬卷還傾動三峽詞源
歸來晚文君未寢相對小妝殘

又

此詞正少游所作
人傳王觀撰非也

曉色雲開春隨人意驟雨方過還晴高臺芳樹飛燕蹴
紅英舞困榆錢自落秋千外綠水橋平東風裏朱門映
柳低按小秦箏多情行樂處珠鈿翠蓋玉轡紅纓漸

酒空金盞花困蓬瀛
苴蔻梢頭舊恨十年夢屈指堪驚
凭欄久疎煙淡日寂寞下蕪城

又

雅燕飛觴清談揮麈使君高會羣賢密雲雙鳳初破縷
金團窗外爐烟似動開尊試一品奔泉輕淘起香生玉
乳雪濺紫甌圓
嬌鬟宜美盼雙擎翠袖穩步紅蓮坐
中客翻愁酒醒歌闌點上紗籠畫燭花光弄月影當軒
頻相顧餘歡未盡欲去且留連

桃源憶故人

玉樓深鎖薄情種
清夜悠悠誰共羞
見枕衾鴛鳳悶即
和衣擁
無端畫角嚴城動
驚破一番新夢
窗外月華霜重
聽徹梅花弄

淮海長短句卷中

欽定四庫全書薈要卷一萬五千二百六十七

集部

淮海長短句卷下

宋 秦觀 撰

長短句

調笑令十首

并詩

王昭君

詩曰

漢宮選女適單于
明妃歛袂登羶車
玉容寂寞花無主

顧影低回泣路隅行行漸入陰山路目送征鴻入雲去
獨抱琵琶恨更深漢宮不見空回顧

曲子

回顧漢宮路捍撥檀槽鸞對舞玉容寂寞花無主顧影
偷彈玉筍未央宮殿知何處目送征鴻南去

樂昌公主

詩

金陵往昔帝王州樂昌主第最風流一朝隋兵到江上

共抱恹恹去國愁
越公萬騎鳴笳鼓
劍擁玉人天上去
空攜破鏡望紅塵
千古江楓籠輦路

曲

輦路江楓古樓上
吹簫人在否
菱花半壁香塵污
往日繁華何處舊
歡新愛誰為主
啼笑兩難分付

崔徽

詩

蒲中有女號崔徽
輕似南山翡翠兒
使君當日最寵愛

坐中對客常擁持一見裴郎心似醉
夜解羅衣與門吏
西門寺裏樂未央樂府至今歌翡翠

曲

翡翠好容止誰使庸奴輕點綴
裴郎一見心如醉笑裏
偷傳深意羅衣深夜與門吏暗結城西幽會

無雙

詩

尚書有女名無雙蛾眉如畫學新粧
伊家仙客最明俊

舅母唯只呼王郎尚書往日先曾許數載睽違今復遇
聞說襄江二十年當時未必輕相慕

曲

相慕無雙女當日尚書先曾許王郎明俊神仙侶腸斷
別離情苦數年睽恨今復遇笑指襄江歸去

灼灼

詩

錦城春暖花欲飛灼灼當庭舞柘枝相君上客河東秀

自言那得傍人知妾願身為梁上燕朝朝暮暮長相見
雲收月墮海沉沉淚滿紅綃寄腸斷

曲

腸斷繡簾捲妾願身為梁上燕朝朝暮暮長相見莫遣
恩遷情變紅綃粉淚知何限萬古空傳遺怨

眇眇

詩

百尺樓高燕子飛樓上美人顰翠眉將軍一去音容遠

只有年年舊燕歸
春風昨夜來深院
春色依然人不見
只餘明月照孤眠
回望舊恩空戀戀

曲

戀戀樓中燕燕子
樓空春日晚將軍
一去音容遠空鎖
樓中深怨春風重
到人不見十二闌
干倚遍

崔鶯鶯

詩

崔家有女名鶯鶯
未識春光先有情
河橋兵亂依蕭寺

紅愁綠慘見張生張生一見春情重明月拂牆花影動
夜半紅娘擁抱來脉脉驚魂若春夢

曲

春夢神仙洞冉冉拂牆花樹動西廂待月知誰共更覺
玉人情重紅娘深夜行雲送困驪釵橫金鳳

採蓮

詩

若耶溪邊天氣秋採蓮女兒溪岸頭笑隔荷花共人語

煙波渺渺蕩輕舟數聲水調紅嬌晚棹轉舟回笑人遠
腸斷誰家遊冶郎盡日踟躕臨柳岸

曲

柳岸水清淺笑折荷花呼女伴盈盈日照新妝面水調
空傳幽怨扁舟日暮笑聲遠對此令人腸斷

煙中怨

詩

鑑湖樓閣與雲齊樓上女兒名阿溪十五能為綺麗句

平生未鮮出幽閨謝郎巧思詩裁剪能使佳人動幽怨
瓊枝壁月結芳期斗帳雙雙成眷戀

曲

眷戀西湖岸湖面樓臺侵雲漢阿溪本是飛瓊伴風月
朱扉斜掩謝郎巧思詩裁剪能動芳懷幽怨

離魂記

詩

深閨女兒嬌復癡春愁春恨那復知舅兄唯有相拘意

暗想花心臨別時
離舟欲解春江暮
冉冉香魂逐君去
重來兩身復一身
夢覺春風話心素

曲

心素與誰語
始信別離情
最苦蘭舟欲解
春江暮
精爽隨君歸去
異時攜手重來處
夢覺春風庭戶

虞美人三首

高城望斷塵如霧
不見聯驂處
夕陽村外小灣頭
只有柳花無數
送歸舟
瓊枝玉樹頻相見
只恨離人遠
欲

將幽恨寄青樓爭奈無情江水不西流

又

碧桃天上栽和露不是凡花數亂山深處水潄洄可惜
一枝如畫為誰開輕寒細雨情何限不道春難管為
君沉醉又何妨祇怕酒醒時候斷人腸

又

行行信馬橫塘畔烟水秋平岸綠荷多少斜陽中知為
阿誰凝恨背西風紅粧艇子來何處蕩槳偷相顧鴛

鴛鴦驚起不無愁
柳外一雙飛去却回頭

點絳脣二首

桃源

醉漾輕舟信流引
到花深處塵緣相誤
無計花間住

烟水茫茫千里斜
陽暮山無數亂紅如
雨不記來時路

又

月轉烏啼畫堂宮
徵生離恨美人愁悶
不管羅衣褪

清淚斑斑揮斷柔
腸寸嗔人問背燈偷
搵拭盡殘妝粉

品令二首

幸自得一分索強教人難喫好好地惡了十來日恰而今較些不須管吸持教笑又也何須肫纖衡倚賴臉兒得人惜放軟頑道不得

又

掉又曜天然箇品格於中壓一簾兒下時把鞋兒踢語低低笑咭咭每每秦樓相見見了無限憐惜人前強不欲相沾識把不定臉兒赤

南歌子三首

玉漏迢迢盡銀潢淡淡橫夢回宿酒未全醒已被鄰鷄
催起怕天明 臂上妝猶在襟間淚尚盈水邊燈火漸
人行天外一鉤殘月帶三星

又

愁鬢香雲墜嬌眸水玉裁月幃風幌為誰開天外不知
音耗百般猜 玉露沾庭砌金風動瑄灰相看有似夢
初回只恐又拋人去幾時來

又

香墨彎彎畫燕脂
淡淡勻揉藍衫子
杏黃裙獨倚玉闌
無語點檀唇
人去空流水
花飛半掩門
亂山何處覓
行雲又是一鉤
新月照黃昏

臨江仙二首

千里瀟湘接藍浦
蘭橈昔日曾經
月高風定露華清
微波澄不動
冷浸一天星
獨倚危樓情悄悄
遙聞妃瑟
泠泠新聲含盡
古今情
曲終人不見
江上數峰青

又

髻子偎人嬌不整
眼兒失睡微重尋思模樣早心忪斷
腸攜手何事太怱怱
不忍殘紅猶在臂
翻疑夢裏相逢
遙憐南埭上孤蓬
夕陽流水紅滿淚痕中

好事近

夢中作

春路雨添花花動一山春色行到小溪深處有黃鸝千
百飛雲當面化龍蛇
天嬌轉空碧醉臥古藤陰下了
不知南北

淮海長短句卷下

謹案卷上第三頁後五行向人依舊按詞綜向作
照

第三頁後八行水邊紅袂分時刊本袂訛社據詞
綜改

卷中第一頁後六行斷續金爐小篆香刊本續訛
盡據詞綜改又按詞綜金作薰

第三頁前一行郴江幸自遶郴山按草堂詩餘幸
作長


第六頁後四行遙夜沉沉如水按詞綜沉沉作月

明

第八頁前四行湘天風雨破寒初按詞綜湘作滿

麗譙吹罷小單于按詞綜罷作徹





總校官庶吉士臣張能照
校對官編修臣朱 攸
謄錄舉人臣勵世馨

